



**M**Athæus honestis parentibus natus, & optimè educatus fuit. Is cum felici indole conspicius esset, à pueris literis incubuit, atque prima artium & linguarum fundamenta egregiè iecit. Inde sese ad varias academias contulit, ac in primis Erdphurdiaè philosophiæ præclaram operam nauauit. In ea quoque adeò profecit, ut inter eius Gymnasiij professores reciperetur. Eam functionem is magna laude administravit, atque sua eruditione & docendi perspicuitate sibi magnum nomen comparauit. quin etiam Rhetorices & Physices compendia post multos alios diligentissimè conscripsit, quæ quidem ob exemplorū copiam & methodum singularem lectu sunt dignissima. Hac ratione Mathæus etiamnum Erdphurdiaè pergit, atque sua eruditione eam Academiam antiquitus celebrem longè celebriorem reddit. Anon.